



**PARTORDING NI PARNINGOTAN  
TINGKI PANOMPAON  
HUHUT MINGGU EKOLOGI DI HKBP  
(MINGGU XVII DUNG TRINITATIS)**

📖 **Ev : Psalmen 104 : 1 – 3 + 13 - 24**

📖 **Ep : Johannes 3 : 13 - 18**

**TOPIK:**

**“HABALGAON NI JAHOWA DI BAGASAN SUDE NA TINOMPANA”**



*The firstfruits of hope*  
(Rom 8:19-25)

**HURIA KRISTEN BATAK PROTESTAN  
MINGGU, 22 SEPTEMBER 2024**

## **JOUJOU TU PARMINGGUON :**

U : Di Minggu sadari on, rap dohot sandok huria di portibi on tapatupa do parningotan Tingki Panompaon ni langit dohot tano on ro di nasa isina. On ma paduahalihon hurianta HKBP marningot panompaon ni Debata Amanta di langit dohot tano on. Marhite parningotan on, lam togu ma haporseaonta tu Debata Ama i na manompa langit dohot tano on dohot nasa isina naung mansai denggan, jala ndang marpansohotan pangaramotionNa huhut mangalehon denggan basaNa tu nasa na mangolu di portibi on. Dibahen i, tama situtu do tapasahat pujipujian dohot hamauliateon ni rohanta nang tondinta tu Debata.

Di sandok HKBP, laos tabahen do Minggu 22 September 2024 on gabe Minggu Ekologi, laho paingothon hita di panjouon, ulaon, dohot tanggungjawabta songon halak na porsea laho pauliulihon hasadaon ni nasa na tinompa. Ndada holan sihataan sambing ianggo ekologi i di Hurianta HKBP, alai konteksta do ekologi i laho marhuria, marteologi, marhadaulaton huhut mangolu. Jala ndada holan inganan hangoluanta ianggo portibi on, alai bagus ni Debata do i, inganan parsombaonta tu Debata, manangihon hataNa, jala manghangoluhon holong ni rohaNa. Alani i tapuji ma Debata marhite na rap hita marende!

### **1. Marende BE. HKBP No. 569 : 1 – 3 “O DEBATA TUNG LONGANG DO ROHANGKU” BL. 569**

🎵 O Debata tung longang do rohangku, molo hubereng na tinompaMi.  
Saluhut bintang, hilap dohot ronggur, manghatindanghon hasangaponMi.  
Marende au Tuhan mamuji Ho, o Debata, sangap do Ho.  
Marende au Tuhan mamuji Ho, o Debata, sangap do Ho.

🎵 Di ladang di adaran dohot tombak, marende pidong tung mansai sonang.  
Punsu ni dolok, sunge dohot rura, mamaritahon sangapMi Tuhan.  
Marende au Tuhan mamuji Ho, o Debata, sangap do Ho.  
Marende au Tuhan mamuji Ho, o Debata, sangap do Ho.

----- *Jongjong* -----

🎵 Molo huingot balga ni holongMu, marhite Jesus na tarsilang i.  
Anak sasadaMi o Debatangku, dilehon Ho manobus jolma i.  
Marende au Tuhan mamuji Ho, o Debata, sangap do Ho.  
Marende au Tuhan mamuji Ho, o Debata, sangap do Ho.

**2. VOTUM – INTROITUS – TANGIANG:**

U : Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Parbadia na tumompang langit dohot tano on. **Amen.** Pinuji ma Debata Sitompang langit dohot tano on! TanganNa do na jumadihon nasa na tinompang. Hatiuron dialithon Ibana hira ulos, Ibana pahembangkon angka langit songon rimberimbe. Ibana manggulanggulangi di angka aek bilutNa parginjang; huretaNa do dibahen angka ombun i, mardalandalan do Ibana di atas habong ni alogo. Nunga dipaojak Ibana tano on tu angka ojahanna i, asa unang lalolalo salelenglelengna. Halomohon Jahowa, jadi lehononNa ma tu ho na pinangido ni roham. Pasahat ma dalanmu tu Jahowa jala haposi Ibana, asa Ibana paturehon. **Haleluya!**

**H : (Mangendehon): BE. HKBP No. 852 : 1 "HALELUYA (3X) BL. 852**

🎵 *Haleluya... Haleluya... Haleluya.*

U : **Martangiang ma hita!** Ale Tuhan Debata, Amanami Parasiroha na sumurung! Mansai denggan do ditompang Ho langit dohot tano dohot nasa isina, jala ndang hea ditadinghon Ho ulaon ni tanganMu. Pinuji ma GoarMu salelengnilelengna. Ala balga ni holongMu marhite Kristus, AnakMi, nunga dibahen Ho padan tu saluhut na tinompangMi, jala ndang hea diose Ho padan naung binahenMi. Gok denggan ni basaM do langit dohot tano on, ale Amang. Mulak rata do asi ni roham jala ndang marpansohotan denggan ni basaM.  
Rap dohot nasa na tinompang hupuji hami ma Ho ale Debata Ama, Anak dohot Tondi Parbadia. Rap dohot saluhut angka na porsea di portibi on hupestahon hami ma tingki panompangMu di langit, tano

dohot nasa isina. Di sandok HKBP sadari on, hubahen hami ma Minggu Ekologi manang minggu hasadaon ni nasa na tinompa. Pauba ma andung dohot angguknami gabe pujipujian tu Ho, ale Amang. Pahisar ma tano naung tinompaMi, naung sega ala haginjangon ni roha dohot hamongkuson ni jolma i, marhite panghophopon ni Jesus Kristus, AnakMi di hau pinarsilang i. Sai bahen ma hami saluhutna gabe jolma na tinompa na imbaru marhite Tondi Parbadia. Amen.

**(Hundul)**

**3. Marende BE. HKBP No. 116 : 4 “DITOMPA HO DO AU” BL. 243**

♪♪ Ale Debatangki Sitolusada i, bongoti rohangki parbadiai ma i  
Sai Ho ma lam hutanda, gogongku lam paganda  
Manangkup haluaon, maniop hatuaon Ni Ama, Anak,Tondi i, na tong pujion i.

**4. P A T I K :**

U : Tangihon hamu (Tatangihon) ma Patik ni Debata di Minggu sadari on,  
i ma na nienet sian **Konfessi HKBP taon 1996 bindu 5, taringot tu  
Lingkungan Hidup:**

*Tahaporseai jala tahatindanghon do:*

Ditompa Debata do jolma nang inganan parmianan dohot inganan pangulaonna di portibi on (1 Musa 2:5-15). Ibana do nampuna sude, na mangalehon hangoluan tu sude na tinompaNa i. Ingaran pangulaon ni jolma i ma darat, laut dohot hajanghajang (langit, ruang angkasa). Dilehon Debata do huaso tu jolma i laho paulihon portibi on di bagasan tanggung jawab na gok. Ulaon ni Jesus Kristus do paluahon jolma i, nasa na tinompa i songon i portibi on sandiri (Kol 1:15-20, Rom 8:19-33).

*Marhite on:* Tahatindanghon do tanggung jawab ni jolma pangoluhon (melestarikan) sude na tinompa ni Debata asa boi ibana mangula, hipas dohot marsonang (sejahtera) (Psalmen 8:4-10).

Taalo do angka usaho na manegai lingkungan marhite na manutungi dohot manabai hau di tombak manang harangan (5 Musa 5:20, 19-



20). Taalo do angka usaho na mangalito hi aek dohot auangauang (udara), nang aek panirisan (limbah) na marisi rasun sian angka pabrik marhite so manganturehon halalao ni aek panirisan i pola tahe menegai aek siinumon, suang songon i taalo do angka pencemaran udara na manegai parhosaan ni jolma. (paheba Psalm 104:1-23, Pangungkapon 22:1-2).

*Antong rap mangido gogo ma hita sian Tuhan Debata laho mangulahon na hombar tu PatikNa i.*

**U+H : Ale Tuhan Debata sai pargogoi ma hami mangulahon na hombar tu PatikMi. Amen.**

**5. Marende BE No. 411 : 1 + 3 “NANG PE RARA DOSAMUNA” BL. 274**

♪♪ Nang pe rara dosamu ias dibaen mudarHu.  
Nang pe rara dosamu ias dibaen mudarHu.  
Na dapdap songon hasumba songon itak do.  
Nang pe rara dosamu, nang pe rara dosamu,  
ias dibaen mudarHu, ias dibaen mudarHu.

----- **Jongjong** -----

♪♪ SesaonNa dosamu, ndang dibaloshon tu ho  
SesaonNa dosamu, ndang dibaloshon tu ho  
Tu Jesus ro ho na loja, di si sabam ho.  
SesaonNa dosamu, sesaonNa dosamu,  
Ndang dibaloshon tu ho, ndang dibaloshon tu ho.

**6. MANOPOTI DOSA:**

**U : Tatopoti ma dosanta, martangiang ma hita!** Ale Tuhan Debata, Amanami, Sitompa saluhut. Nunga denggan ditompa Ho tano on nang sude pangisina. Alai husegai hami do i ala haginjangon ni roha dohot hamongkusonnami.

**H : Asi ma rohaM di hami ale Tuhan, sai sesa ma nasa dosanami maradophon angka na tinompaMi.**

U : Ale Tuhan Debata, dipillit Ho do hami laho pauliulihon tano na tinompaMon. Alai hurajumi hami, ndang hibul rohanami laho mangaradoti hasadaon ni nasa na tinompaMi. Na hurang do parsituonnami maradophon angka na tinompaM na asing. Holan na ringkot tu dirinami sambing do huparhamaol hami, jala ndang huingot hami na marsigantung tu hasadaon ni nasa na tinompa i do parngoluonnami di tano on.

**H : Asi ma rohaM di hami ale Tuhan, sai sesa ma nasa dosanami maradophon angka na tinompaMi.**

U : Ale Tuhan Debata, huparhatopot hami do na jotjot hupasombu hami angka na humaliang hami dohot bagas joroMi pe ndang ias. Huparhatopot hami do na mansai losok rohanami manuan huhut pagodanggodanghon hau umbahen na lam mohop jala mahirtang portibi on.

**H : Asi ma rohaM di hami ale Tuhan, sai sesa ma nasa dosanami maradophon angka na tinompaMi.**

U : Ale Tuhan Debata, disuru Ho do hami marbarita na uli na sian Tuhan Jesus Kristus tu nasa na tinompa. Alai jotjot huarsahi hami angka na tinompaMi marhite na husegai hami jala husiaphon hami tombak, laut dohot langit inganan ni nasa na tinompaMi.

**H : Asi ma rohaM di hami ale Tuhan, sai sesa ma nasa dosanami maradophon angka na tinompaMi.**

U : *Bagabaga ni Debata taringot tu hasesaan ni dosa!*

Songon on do Hata ni Tuhan Jahowa: Ro ma hamu tu Ahu, asa mangolu tondimuna, ninna Tuhan Jahowa. Tung sura rara dosamuna songon abit bunga dapdap, bontar do bahenonHu songon itak; nang pe rara songon abit hasumba, gabe songon hapas do muse. Hasangapon ma di Debata na di ginjang!

**U+H : Amen.**

**(Hundul)**

**7. Marende BE No. 783 : 1 + 4 “TUHAN SITOMPA SALUHUT” BL. 783**

♪♪♪ Tuhan sitompa saluhut, Ho do na marmulia i,  
Ndang tarasam saluhut nilehonMi.

♪♪♪ Ditongos Ho do AnakMi laho manobus jolma i,  
Ndang tarasam asiMi, nilehonMi.

**8. EPISTEL:**

U : Tangihon hamu (Tatangihon) ma Hata ni Debata turpuk Epistel di ari  
Minggu on, tarsurat di **Johannes 3 : 13 - 18** : Ndang adong na  
manaek tu banua ginjang, ia so naung tuat i sian banua ginjang; i ma  
Anak ni jolma i, na di banua ginjang i hian.

H : **Jadi songon naung pinatimbo ni si Musa ulok i di halongonan,  
songon i naeng patimboon Anak ni jolma i, asa dapotan hangoluan  
na salelenglelengna ganup na porsea di Ibana.**

U : Ai songon on do holong ni roha ni Debata di portibi on, pola do  
AnakNa na sasada i dilehon, asa unang mago ganup na porsea di  
Ibana, asa hangoluan na salelenglelengna di ibana.

H : **Ai ndang na disuru Debata AnakNa i tu portibi on, asa uhumanNa;  
naeng paluaonNa portibi on tahe, umbahen na disuru.**

U : Ndang siuhuman na porsea di Ibana; alai anggo na so porsea i, nunga  
hona uhum, ala so porsea ibana di Goar ni Anak sasada ni Debata.

*I do sahatna. Martua do angka na tumangihon Hata ni Debata jala  
na umpeopsa.*

U+ H: **Amen.**

**9. Marende BE. HKBP No. 372 : 1-7 “ROHANGKU SAI HALASHON MA” BL. 99**

♪♪♪ Rohangku sai halashon ma sude na sian Debata, luhut denggan basaNa  
Sai tatap hauma i sude, nang porlak dohot tombak pe,  
Na uli do rupana, na uli do rupana

----- **Jongjong** -----

🎵 Sude na di balian i do pasangaphon Goar ni Tuhanta Debatanta  
Nang eme na di hauma i, nang hau sude na rata i,  
Dipuji do Tuhanta, dipuji do Tuhanta

#### **10. MANGHATINDANGHON HAPORSEASON:**

**U :** Sadari on rap mamestahon Tingki Panompaon do hita dohot sude angka na porsea di liat portibi on, jala di sandok HKBP tapatupa do sadari on Minggu Ekologi. Marhite pesta Tingki Panompaon dohot Minggu Ekologi on, naeng tarataratai muse haporseaonta paboa na tinompa ni Debata do langit dohot tano on, na tatanda marhite Jesus Kristus.

**H :** Marhite pesta on naeng tapaingot muse dirinta, paboa na sojolma i na gabe pamusatan ni saluhut na tinompa dohot nasa hangoluan. Nandang tarsirangjolma i sian tano na tinompa jala na hinaholongan ni Debata, na tinobus marhite mudar ni AnakNa, jala dipaimbaru marhite Tondi Parbadia.

**U :** Marhite pesta Tingki Panompaon dohot Minggu Ekologi on disosoi do hita laho manghangoluhon haiason, mangorui dohot pasidinghon nasa rompak-rompak, mamarangehon ngolu na denggan maradophon na humaliangta, mamarhamaol nasa na tinompa, marpangontik jala jamot tu aek, listrik dohot BBM, jala sigop maradophon angka tanda-tanda ni hasesega ni na tinompa ni Debata di sandok portibi on, huhut martoruk ni roha di bagasan hadaulaton, dohot panghatindanghononta angka naung tinobus marhitehite hamamate dohot haheheon ni Jesus jala marhite TondiNa dibahen hita gabe anak haholongan ni Debata.

**H :** Marhite pesta on, rap do hita dohot nasa na tinompa laho marpanghirimon jala mangula pasauthon portibi on asa tigor, gok dame, ias jala marudut.



U : Antong, tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok!

**U + H : Ahu porsea di Debata Jahowa.... d.u**

**(Hundul)**

**11. K O O R**

**12. TINGTING:**

**13. K O O R**

**14. Papungu Pelean Huhut Marende BE. HKBP No. 781 : 1 - 4 “SAI HALASHON NA TINOMPA” BL. 781 (Pelean Ia & Ib)**

♪♪ Sai halashon na tinompa ni Tuhanta Debata  
Sunge, laut, dohot tombak ro di parlangitan i, ro di parlangitan i.

♪♪ Marsinondang bulan bintang, nang mata ni ari pe,  
Ombun nambur dohot udan, dipatupa Ho sude, dipatupa Ho sude.

-----Musik-----

♪♪ Saluhut na natinompa, pasangaphon Debata,  
Au pe dohot do mamuji, pasangaphon GoarNa i, pasangaphon GoarNa i.

♪♪ Sogot dohot au marnida Ho di hasangaponMi,  
Di ingananMi naung monang, na manjalo tumpal i, na manjalo tumpal i.

-----Musik-----

**15. J A M I T A: Psalmen 104 : 1 – 3 + 13 – 24**

**16. Papungu Pelean Huhut Marende BE. HKBP No. 774 : 1-4 “TUNG MABAOR SIAN HO” BL. 774 (Pelean II)**

♪♪ Tung mabaor sian Ho, mual hangoluan i,  
Ai torop pe batang aek angka dolok dohot rura,  
Nang pe langit dohot tano, Ho do na manompa i,  
Ho do na manompa i, Ho do na manompa i, Ho do na manompa i,

♪♪ Ai huboto do tangkas hagoonMi Tuhan,  
Ho do na so hatudosan na tongtong Ho pasangapon  
Las rohangku pasangaphon, ro marsomba tu joloM,  
Ro marsomba tu joloM, ro marsomba tu joloM, ro marsomba tu joloM

-----Musik-----

♪♪ Tung tarapul rohangki mingot denggan ni basaMi,  
Nandang tarasam be argana ndang marbatas nang godangna,  
Disondangi do rohangku, lao mamereng holongMi,  
Lao mamereng holongMi, lao mamereng holongMi, lao mamereng holongMi  
♪♪ Huhilala holongMi na manogu rohangki,  
Unang loas au be lilu, manadinghon Ho Tuhanku,  
Pandang i do tujuongku, saleleng di ngolungki,  
Saleleng di ngolungki, saleleng di ngolungki, saleleng di ngolungki,

-----Musik-----

### 17. Parsuruon (Jongjong)

U : Mansai holong do roha ni Debata tu portibi on, na tinompaNa i marhite hataNa. Nandang lomo rohaNa sega jala siap portibi on ala pangalaho nijolma manisias. Dilehon do AnakNa na sasada i mate di hau pinarsilang laho padamehon saluhut dosanta. Jala hehe Ibana sian angka na mate asa dapotan ngolu na imbaru hita. Nandang marnaloja Ibana paimbaruon portibi na tinompa jala niasianNa i marhite TondiNa. Na tarjou do hamu dohot ahu gabe parbarita na uli tu nasa na tinompa.

**H : Di son do hami, ale Tuhan, suru ma hami!**

U : Bahen ma sandok hadaulaton, ulaon dohot ngolum gabe pasupasu tu portibi on. Parbadi ai ma GoarNa marhite holong ni roha dohot hasatiaonmu tu nasa na tinompa.

**H : (Mangendehon) BE No. 729 "LAHO MA HAMU"**

♪♪ Laho ma hamu tu liat portibion, ninna Jesus Kristus Tuhan i  
Ninna Jesus Kristus Tuhan i, Baritahon ma barita na uli i, tu saluhut na tinompa i Tu saluhut na tinompa i.

Asa marlas ni roha ma, langit nang dohot hajanghajang i  
Marolopolop angka ladang i, ro di hau na di harangan i.  
Asa martopaptopap sunge i, marhasakhasak tao nang laut i  
Marolopolop ma portibion nang sude na pangisina i. Amen.

**18. Tangiang Pelean – Tangiang Ale Amanami - Tangiang Pasupasu:**

U : Tatangianghon ma peleanta. Ale Debata, Amanami na di banua  
ginjang! Ho do haroroan ni saluhut silehonlehon na denggan dohot  
nasa ulibasa na mauliutus. Hupasahat hami ma sian na nilehonMi tu  
hami, peleannami tu Ho. Sai jalo ma i gabe uap na hushus di joloM.  
Pasupasu ma i jala ramoti asa huparhaseang hami pelean on,  
patimbulhon harajaonMu di tongatonga ni HuriaM dohot di portibi  
on. Buhai ma rohanami marhitehite TondiM, asa lam hutanda hami  
godang ni silehonlehonMi tu hami, asa lam girgir hami mandok  
mauliate tu Ho, marhitehite Jesus Kristus Tuhannami. Amen.

**H : (Mangendehon) BE. HKBP No. 204 : 2 “NDANG TADINGHONONHU  
HO” BL. 73**

*♪♪ Nasa na nilehonMi, tondi ro di pamatanghu  
Hosa dohot gogongki, ro di saluhut artangku  
Hupasahat i tu Ho, na so unsatonhu do.*

U : Ale Amanami na di banua ginjang! Sai pinarbadia ma GoarMu! Sai ro  
ma harajaonMu! Sai saut ma lomo ni rohaM di banua tonga on  
songon na di banua ginjang! Lehon ma tu hami sadari on hangoluan  
siapari! Sesa ma dosanami songon panesanami di dosa ni dongan na  
mardosa tu hami! Unang hami togihon tu pangunjunan! Palua ma  
hami sian pangago!

**H : (Mangendehon): BE. HKBP No. 841 : 1 “AI HO DO NAMPUNA  
HARAJAON” BL. 841**

♪♪ *Ai Ho do nampuna harajaon, dohot hagagoon*  
*Ro di hasangapon, saleleng ni lelengna, Amen.*

U : Dipasupasu jala diramoti Tuhan Debata ma ho *(hita)*! Disondanghon  
Tuhan Debata ma bohiNa tu ho *(hita)* jala asi ma rohaNa mida ho  
*(hita)*! Didompakhon Tuhan Debata ma bohiNa tu ho *(hita)* jala  
dipasaorhon ma dameNa tu tondiM *(tondinta be)*! Amen.

H : (Mangendehon ) BE. No. 845 : 1 “AMEN (3x)” BL. 845

♪♪ *Amen, Amen, Amen.*

